

Ленинград ил минъгън кўч-кўлсчирин демонстрац болв

ЛЕНИНГРАД, июлин 7. (ТАСС). Ленинградт 250 джилә бõнә байрин хўрм кўч-кўлсчирин агъу ик демонстрацар тõгсв. Эндр õрўн õрләгъяс авн гилтә цуг олн-әмтн байрин учрар сәәхрўлдж кеерўлчксн проспектс болн уульнцсар гарцхав. Õмн õдрнъ энўнўр Советск Союзин партийн болн государственн деятельмўд ирсн—ленинградцириг онц икәр байрдулв.

Хама болвчн джиргълин бәәдл, дун, биигъин болн музыкин ә сонъсгдв. Тууджлгдсн бәәшнъгин площадь деер õрўн 10 часла ленинградцирин демонстрац эклв. Демонстрантирин зергләнд—урднъ революционн кев-янзарн медгдг Путиловск, ода Кировск заводин, металлическ, Невск машиностроителън, „Электросила“ заводмудин болн нань

чигн герой-балгъсна предприятьсин, научн институтсин болн ах сургъулин заведеньсин кõдләчнр орлццхав. Ўрмўд Н.А. Булганин, К.Е. Ворошилов, Ф.Р. Козлов, О.В. Куусинен, Е.А. Фурцева, Н.С. Хрущев, Н.М. Шверник, балгъсна болн областин партийн болн советск организацсин гардачнр деернъ зогсджасн трибуна хаджугъар чилшго олн кўч-кўлсчирин колонн гарцхав. 1917 джилин революционн хўвсхлд орлцджасн олн улс, социалистическ кўч-кõлснә героймуд, производствин новатормуд энўнд бәәцхәв.

Трибун деер бәәсн улсиг ленинградцир халунар мендлдж йõрәцхәв. Советск правительствиг болн Коммунистическ партин Централън Комитетиг йõрәдж хәәкрлдж мендлгън шуугад сонъсгдв.

Нарт делкәг тõвшўн, дән уга, ни бәәтхә гисн дуудвр деернъ бичгсн улан эд делсўлсн демонстрантс йовцхав. Тõвкнўн бәәхин, демократин болн социализмин тõлә ноолдджах цуг олн-әмтнд теднах-дўўгъин мендән илгәцхәв. КПСС-н ЦК-н июньск Пленумин шиидвриг таасджахан, олн-әмтн советск правительствин болн коммунистическ партин хоорндан ни-ниицнъгъўгкесг олн плакатсд бичгснъ келдж õгнә.

Гурвн часас ўлўдән демонстрац болв. Энўнд долан зун минъгънәс ўлў ленинградцир орлцв. Советск Союзин Коммунистическ партин Централън Комитетин эргнд советск олн-әмтн улм õбрддж хамцджахиг, терўнә кўчн-чидлинъ эднә байрин-джиргълин элдв демонстрац медўлв.